

## 香港青年獎勵計劃 獲金章之得獎義工—伍芷韻分享

給所有薪火既朋友：

好想借呢個機會話畀大家聽：考金章真係好抵玩！

我之所以會話「抵玩」，係因為成個過程令我有好多好難忘又好開心既回憶，而且仲學到好多野。

先講團體生活科。我當時參加左 joint-u 搞既馬尼拉交流團。係果 5 日 4 夜既交流團，我地到訪過當地既大學同小學，去過貧民區，同過果度 d 居民傾偈，亦都有遊覽過當地既名勝。最開心都係可以識到一班志同道合又 o 岩傾 o 岩講既朋友，大家都係用好認真既態度去對待個金章。我地由唔熟玩到熟，而且係果幾日，每當我地遇到有問題都會互相幫忙，短短 5 日既時間就令我地有深厚既感情。到而家我地都仲有保持聯絡。

好多人都以為野外鍛鍊科要行兩次 4 日 3 夜條件好辛苦既事，但其實安排得好既話，4 日 3 夜係可以好輕鬆。我自己就覺得兩次 4 日 3 夜都行得好開心。我體能唔算話十分好，但只要按自己既速度，加上適當既休息，其實就足夠有餘。加上我既拍擋入面有一個係地圖王，兩個係笑彈，所以全程都可以話開心又放心。

不過間中都有 d 人事問題需要處理，最嘔血果次就係 final practice 果次，有個組員中途話要 quit，勸左好耐都留唔住佢，咁我地都唯有放手畀佢走，點知佢隔左一日竟然話要返黎！！我當時梗係激到想死喇，我其實都好唔想畀佢返黎，因為我覺得佢做呢兩個決定都好自私。後尾大家都係因為見佢已經 24 歲，所以先畀個機會佢繼續行。

係呢件事上，我最想多謝番我當時既導師鄭 sir。佢全程都係用不溫不火既態度去處理成件事，除左有問我地既意見之外，亦都有同我地解釋番佢點解會做呢個決定，佢畀我睇到咩叫顧全大局。所以真係有問題發生先會有野學，呢次我都袋左唔少野落袋。

遇到最多「濕滯」野就一定係服務科。我幾乎係每一個活動都遇到問題，由一 d 大問題到一 d 好瑣碎但係唔解決唔得既問題都有，就連我交 log book 都要畀個服務科科委員彈回

頭再改。經過服務科既洗禮之後，我明白左兩樣野：搞活動一定要好小心，即使未必發生既野都要諗埋點樣去處理。另外，自己做野最好係有系統既，一黎可以方便自己管理，二黎如果你做既野係要畀其他人睇既話，人地都會容易 d 明白，challenge 都少 d。

至於技能同康體科，我就覺得呢兩科係畀你一個機會去學新野，或者係學一 d 你早就話個想學但係死都唔肯去實踐既野。我個人就覺得呢兩科係最簡單，你只要揀左你想學既野，然後就 plan 自己幾時做，做完之後交個 log，咁就搞掂喇。

同我一齊考章既朋友都覺得最煩就係做 plan & log，我都明白呢 d paper work 確係幾煩下，不過其實呢個模式係現實生活裏面係經常會遇到，就以我既職業為例，我係一個 auditor，每次 audit 一間公司都需要做一份 audit planning，話畀 manager 知我地會打算做 d 乜野，做完成個 audit 後要交報告畀 manager。我有個朋友佢間公司每年年頭都要 set 一個來年既 project plan，要 d 職員自己諗來年想做乜野，去到年尾當然要做返個報告出黎話畀人知自己做左 d 乜喇。咁所以，其實「set 目標, 做 planning, 匯報結果」呢個工作模式係早就已經廣泛應用，AYP 可以話畀一個渠道你去習慣下呢個模式。

我諗大家睇到黎呢度，都應該會覺得金章要做既野都唔係好難，相信大家都會同意大部分既薪火人都有能力做得到(過左廿五既就無得好講喇!)，問題只係在於肯唔肯去做，同埋清唔清楚做黎做乜野。我當初想考金章就係想留個紀念畀自己，因為唔係咁容易有得同特首握手。我識得有人係想報大學果陣多樣野寫落報名表果度。有左目標先會有推動力畀你繼續去做，而最最最重要就係你要肯**堅持**去做。

我好肯定我考金章既目的已經達成，而我亦都好肯定係成個考章過程我得到既比我預期中更多。我好希望我呢篇文章令到更多人了解到金章，從而有更多薪火人去考金章，希望之後每年總部公佈既金章得獎者名單入面都有我地薪火人既名字！

肥牙 (Cynthia)

17/3/09